

28. sept. 2017

**Siunnersuut: Siusinaartumik pensionisiat pillugit Inatsisartut inatsisaata nr. Xx, xx. xxx
2017 allangortinneqarnissaa pillugu**
(Naalackersuisut)

Siumumi siunertarijuaannarparput innuttaasut tamarmiusut periarfissinneqassasut inuiaqatigiinnut akooqataallutik inuuneqarnissaannut. Kinaluunniit avataaniitsinneqassanngilaq. Nunarput tassaasariaqarpoq tamaginnut naligiimmik periarfissaqartitsisoq. Tamanna pisortatigoortumik taamaallaat aalajangersugaassanngilaq, kisianni aamma piviusumik aallaaveqassalluni. SIUMUP siunertariuarsimavaa inuiaqatigiinni sanngiinnerpaat inuuniarnermikkut atugassarititaasa inerisarlugillu pitsaanerpaamik aaqqissugaanissaat, naligiimmik atugassaqartitsineq tamanut atuutseqqullugu aammalu innuttaasut amerlatsikkiartuinnartut imminut pilersuinertik qimakkartuinnartillugu soorlu siusinaartumik pensionisiat eqqarsaatigialugit uninngaannartitaallutik pilersorneqarnerat illuatungilertariaqalermat.

Tamakkua patsisaaqataallutik Siumup Naalackersuisooqatigiinni siuliini inunnik isumaginninnikkut suliffeqarnermullu politikki aaqqissuuteqqinnissaanut siunertaqarsimanitsinnut, taamaalineranilu siusinaartumik pensionisiat tunniunneqartarnerinut sinaakkutissatut allannguuteqartoqarluni. Siusinaartumik pensionisiat, revalideringip aammalu fleksjobip allannguutaasa pingaarnertut siunertaasut tassaasimapput amerlanerpaat isumagineqaannarlutik pilersorneqarneraniit suliffeqarnerup iluani naligiimmik suleqataasutut peqataasutullu periarfissaat atorluas-sallugit.

Taamaammat SIUMUMUT nuannaarutaavoq takusinnaallugu susassaqrarfiit pineqartut aaqqissuuteqqinnerisa iluatsilluarsimanerisa kingunerisaannik asuli sulisoqarsimanngitsoq, tassami 2013-mi siusinaartumik pensionisiallit 2936-iusut tamassa naatsorsuutigineqalerput Aningaasaqarnermut Inatsisissami 2018-imoortussami 2492-nut ikileriaateqassasut. Tamanna ilutigalugu aamma suliffissaaleqineq malunnaatilimmik appariaateqarluarpoq. SIUMUP tanngassimaarutigaa ineriartornermi matumani peqataasinnaalluni, tassami inuit uninngaannarlutik pilersorneqaannartuniit inuiaqatigiinni suliffeqarnerup iluani sulisutut peqataatinneqartalersinnaammata.

Naalackersuisut qinnuigissavavut Aningaasaqarnermi Inatsisissami 2018-imi kisitsisaasut aaq-qeqqullugit – assigiinngitsunik tunngaveqarlutik tunngavilersuimmata aappaani naatsorsuutigineqarluni 2542-iussasut aappaanilu naatsorsuutigineqarluni 2492-iussasut.

SIUMUT isumaqartuarsinnarpoq ilaqutariit ataatsimut isigalugit atugaasa nalilersorneqarnissaat aallaavigalugit nalilersuisoqartassasoq, ilaqutariinni inuit ataasiakkaat immikkut piinnarnagit. Inoqutigiinni inuusaatsikkut kingornussat allangortikkumallugit suliniuteqarnek assigiinngitsunut attuumalluinnarpoq, s.a. suliffeqarnerup iluani ajunnginnerusumik ataavartumillu atasinnaaneq, aammalu meeqqat ulluinnarni toqqissisimanartumik ulluinnarsiutigalugu inuuneqarluarnissaat, kiisalu meeqqerivimmi atuarfimmilu taamatut toqqissisimasumik ineriartortitaanissaat pingaarti-taralugu.

Kinguaasitutigut meeraanermini atonerlunneqarsimasut inersimasunngorlutik kingunerluutaasa qaangerniarnerani psykologit angalaarlutik katsorsaasartut suliaasa iluatsilluarsimaneerit SIUMUMIIT iluarisimaarparput, qularinnginnatsigu aamma taamatut nukittorsaaneq siusinaartumik pensioneqarnerminngaanniik alloriartitseqataasimassasoq suliffeqanernikkut ilaatigullu ilinniagaqalernikkut.

Upperilluinnarparput, qanga siusinaartumik pensionisiaqarnikut – katsorsaaneermi matumani neqeroorutaasumi inuunerminnik ingerlaqqeriarnissamut aqutissiuunneqarluarsimammata, taamaali-llutik sulilersinnaasimallutik imaluunniit ilinnialernissaminnik periarfissinneqalersimallutik.

Tamannami pissutigerpiarlugu SIUMUP naammagisimaarpaa innuttaasut siusinaarlutik pensionisiaqartut allaat 500-nik ikilerisimammata, naak piffissamik sivikitsunnguami angusaagaluartoq. SIUMUMI upperaaput innuttaasunut immikkut ittumik suliniuteqarluni suliffissaqalersitsiniaraanni meeqqanut pitsaanerpaamik sunniuttartoq, inuit imminut naleqartinnerinut minnerunngitsumillu inuiaqatigiinnut tamanut iluaqutaasoq. Taamaaliornikkut inuiaqatigiinni aatsaat akissaqalerluassagatta innuttaasut atugaasa tunngavigalugit ikiortariaqavittut taasariallit toraernerusumik ikiorsiivigissallugit.

Tamannarpiaq patsisigalugu aamma SIUMUP Naalackersuisuniit massakkut saqqummiunneqartut tapersersorpai, taamaalineranilu pissusissamisoorsoraarput utoqqalinersialinnut tunngaviummik tunniunneqartartut eqqarsaatigalugit aamma siusinaartumik pensionisialinnut periarfissiisoqassasoq, aammalu naammagisimaaripput siusinaartumik pensionisiallip nammineq isertitarisinnaasai 80.000 kr.-imut killiliussa q sulilalersoqqittariaqartoq.

SIUMUP siunnersuutigineqartoq tapersersorpaa aappassaanneernissaannullu akuerineqaqqullugu innersuupparput.

Martha Lund Olsen
Siumut